

**2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Anders Olsen, Siumut)

### **Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

### **Aappassaaneerneqarnera**

Naalakkersuisut ataatsimiititaliap siunnersuummik suliarinninnera Naalakkersuisullu allannguutissatut siunnersuutaannut tapersiinerat qujassutigaat.

Aallaqqaasiullugulu erseqqissaatigineqassaaq arsaattarfinnik ivigaasalinnik pilersitsiortorneq aallaavittut kommunit suliaassarimmassuk. Taamaattumillu aalajangernissaq aammalu aningaasaliissutinik tullerijaaarnermi taamatut sanaartornissamut immikkoortitsisoqassanersoq tunngaviatigut kommunini ataasiakkaani aalajangiiffigisassatut inissisimavoq.

Naalakkersuisut siunnersuutigivaat 600.000 kr.-inik immikkoortitsisoqassasoq suliaassarfimmuut aningaasaliissutaareersut iluanniit, kommunit suleqatigalugit sanaartugassatut suliniummik ataatsimik suliaqartitsinissamut, kommunini sisamaasuni tamani qulisamik ataatsimik timersortarfiliortoqarnissaanut. Aningaasaliissutit immikkoortinneqartut siunertaraat arsaattarfiit toqqarneqartut sisamat sannaannik misissuinissaq, missingersuusiornissarlu arsaattarfiit ivigaasanik qallikkat quliat kiassarneqanngitsulli pilersinneqarnerannut aningaasartuutaasussanik, taamaaliornikkut timersorneq tamaat ataatsimut isigalugu ukioq tamaat atugassarititaasut pitsaanerulersikkumallugit. Naatsorsuutigisariaqassaaq timersorfiusinnaasunik qulisanik pilersitsiortorneq missingersuutaasimasunit 6,5 mio. kr.-it missaanniittunit ivigaasalimmik ataatsimik sananermut aningaasartuutaasussat qaffasinnerussasut, arsaattarfiit maanna pioreersut ivigaasanik qallersorneqassappata, kisiannili arsaattarfiit taamaattut atorneqarneri annertunerungaatsiartussaassallutik.

600.000 kr.-it pineqartut pilersaarusiornermut titartaasitsinermullu taamaallaat atugassatut eqqarsaataapput, kommunini tamani qulisamik ivigaaraasalimmillu arsaattarfimmik ataatsimik sanasoqarnissaa eqqarsaatigalugu, taamaalillutik kommunalbestyrelsit ataasiakkaat aalajangiinissaminnut naammattunik tunngavissaqarsinnaaqqullugit. Taamaattumik Naalakkersuisut siunertaraat sapinngisamik annertunerpaamik suliami uani kommunit

peqataatinnegarnissaat, tamatumani aamma arsaattarfiup ivigaaraasallip  
pilersaarusioneqarnerani illoqarfimmi sorlermiittussatut suliarineqarnissaa eqqarsaatigalugu.

Suliniutissap pilersaarisioneqarnera ukiup ataatsip iluani naammassineqarsinnaassagunarpoq.  
Suliniutip aallaaserineqarneranut ilaassaaq piffissaq qanoq sivilutigisoq atortariaqassanersoq  
sanaartukkat naammassineqarnissaannut.

Suliniutissamut pilersaarusioreernerup kingorna sanaartornerup aallartinneqarnissaanut  
pisariaqartinneqassaaq aningaasalersuinissap Inatsisartuniit kommuninilluunniit  
ataasiakkaaniit isumagineqarnissaanut innersuussisoqarnissaa. Naalakkersuisut taamaattumik  
ilisimasinnaanngilaat sanaartornerit qaqugukkut aallartinneqarnissaat, tamatumunnga  
tunngasumik aalajangiisussaatitaaneq Naalakkersuisuniinngimmat.